

Кўпгап - мазмум Камгап - мамдух

Image not found or type unknown



00:30 / 04.05.2017 5246

5366. Абдуллоҳ ибн Умар розияллоҳу анҳумодан ривоят қилинади:

«Набий соллаллоҳу алайҳи васаллам:

«Албатта, Аллоҳ одамларнинг ичида тилини сигирнинг тилига ўхшатиб айлантирган гапдонни ёмон кўради», дедилар».

Абу Довуд ва Термизий ривоят қилганлар.

Шарҳ: Мол кавш қайтарганда тилини икки лунжида айлантирганга ўхшаб, ҳуда-беҳудага балоғатга зеб бериб, ўзини кўрсатиш учун балоғатли сўзлашга ҳаракат қилган одамни Аллоҳ таоло хуш кўрмас экан. Бу маънода эҳтиёт бўлмоқ зарур

5367. Абу Ҳурайра розияллоҳу анҳудан ривоят қилинади:

«Набий соллаллоҳу алайҳи васаллам:

«Ким кишиларнинг ёки одамларнинг қалбини ром қилиш учун сўз ўйини қилишни ўрганган бўлса, Аллоҳ қиёмат куни у одамдан тавбани ҳам, фидяни ҳам қабул қилмас», дедилар».

Абу Довуд ривоят қилган.

Шарҳ: Одамларни қойил қолдириш учун қилинган иш риёдан ўзга нарса бўлиши мумкин эмас. Риё эса доимо мазаммат қилинган нарсадир.

5368. *«Ибн Умар розияллоҳу анҳумо:*

«Машриқдан икки киши келди. Улар хутба қилдилар. Одамлар лол қолдилар. Бас, Расулуллоҳ соллаллоҳу алайҳи васаллам:

«Албатта, баённинг сеҳрлиси ҳам бор» ёки «Албатта, баённинг баъзиси сеҳрдир», дедилар».

Абу Довуд ва Бухорий ривоят қилганлар.

Шарҳ: Машриқдан келган икки киши – Зарбуқон ибн Бадр ва Амр ибн ал-Аҳтам эди. Албатта, чиройли гап кишини сеҳрлаб қўйиши бор.

5369. *«Бир киши туриб, кўп гапирди. Шунда Амр ибн Осс:*

«Агар гапини қисқа қилганида, ўзига яхши бўлар эди. Расулуллоҳ соллаллоҳу алайҳи васалламнинг **«Батаҳқиқ, гапни қисқа қилишни хуш кўрдим** (ёки амр қилиндим). **Албатта, қисқа қилиш яхшидир»,** деганларини эшитганман», деди».

Абу Довуд солиҳ санад ила ривоят қилган.

Шарҳ: Албатта, мазмунсиз кўп гапдан сермазмун оз гап яхшидир.

Шайх Муҳаммад Содиқ Муҳаммад Юсуф

(ҳадис ва ҳаёт китобидан)